

FEHIME SELIMI

KËNGË PËR BLERTËN

Nëpër gishtërinjë po kryqezohen hijet
syve po më rriten lulet e harruara
trëndafilat e zinj
cila rrugë të doli më e gjatë Blertë
cili vaj po të degëzohet në dhembje
rrugëve të kësaj stine
sa stuhi e vetmi në mua
sa mall!

2.

unë di të të mallkoj në heshtje
po ç'e do kur s'kam gjuhë
e nata m'i vjedh fjalët
si kujtimet
unë di ta dashuroj në heshtje
pa fjalë
mallin e një muzgu
dhe shqetësimin
po nuk di ç'ti bëj shiut që më zgjon
kujtimet
ç'ti bëj shiut

3

vaj i pasnatës ëndrrat sërish m'i zgjon
padiktueshëm futesh në fjalën time
më vjedh gjymin
dhe blerimin
trëndafilat e zinj ulin kokën para

dhembjes

cilën fjalë ta bekoj sonte
me këtë bukuri Blertë
cilin varg

4

në ç'udhëkryqe ta vendos peshën
e kësaj nate
dhe hapin tim
në lojën e gishtërinjve
po tretet malli
e blerimi
dikush po m'i vjedh hapat një nga një
në këtë udhëtim të çuditshëm
— po më thërret në lojë

5

e një ditë e di kujtimet do t'i kthehem
do të kërkoj në të mbase
mallin e një moti
atë ditë mbi mua do të bjerin shirat
e të gjitha kohërave
dhe mallkimi!

"Roketa" 1-IV-79 e diel